

Ubavka Gašić je najbolja u kombinaciji u konkurenciji starijih juniorki, a Zdravko Zrnčić treći u kombinaciji među mlađim juniorima.

Dvadeset treće republičko prvenstvo u klasičnim smučarskim disciplinama održano je 1. i 2. marta 1969. godine na Komaru kod Travnika. Mada SSK zauzima drugo mjesto u ekipnoj konkurenciji, primjetno je zaostajanje za ekipom Romanije koja ubjedljivo preuzima primat u smučarskom trčanju u Republici. I u klupskoj aktivnosti primjetno je zaostajanje u radu sa smučarskim trkačima.

Uostalom i rezultati na Prvenstvu na Komaru najbolje govore: među omladincima Mladen Karić je drugi, a Vitomir Ždrale treći. Druga

mjesta pripadaju i štafetama seniora i omladinaca. Nekada su spiskovi uspjeha trkača sekcije SSK na ovakvima takmičenjima bili mnogo, mnogo duži!

U toku marta 1969. godine bilježimo još jedan vrijedan uspjeh članova SSK. U Kranjskoj Gori je održano Međunarodno studentsko prvenstvo Jugoslavije, na kome je nastupila i studentska reprezentacija Sarajeva, u kojoj su među četiri člana bila i dva smučara SSK Dejan Gašić (Mašinstvo) i Dragan Dedić (Viša škola za socijalne radnike). U okviru zvaničnog takmičenja reprezentacija Sarajeva zauzela je treće mjesto, iza Graca i Minhena. Održano je i takmičenje domaćih ekipa, na kome su Sarajlije zauzele prvo mjesto, ispred Ljubljane i Maribora.